



Los ntawm Thawj Tswj Hwm Thomas S. Monson

# Sim Xav Seb Nej Taug Txoj Kev Twg

*Thaum peb tso Yexus ua peb tus Yam Ntxwv thiab peb raws Nws cov hneev taw qab, peb yuav muaj kev nyab xeeb thaum rov qab mus nrog peb Leej Txiv Saum Ntuj Ceeb Tsheej nyob.*

**K**uv cov kwv tij thiab cov muam, kuv txo hwj chim los sawv ntawm nej tag kis no. Kuv thov kom tau nej txoj kev ntseeg thiab kev thov Vajtswv pab kuv thaum kuv hais kuv zaj lus qhia no.

Peb sawv daws tau pib ib txoj kev taug kev zoo kawg nkaus thaum peb ncaim ntawm lub ntuj ntsuj plig thiab los rau hauv qhov chaw nyuaj nyuaj no uas peb hu kev ua neej nyob. Lub ntsiab tseem ceeb tshaj plaws hauv ntiaj teb no yog kom txais ib lub cev nqaj daim tawv, kawm ua ub ua no uas peb tsuas kawm tau thaum peb ncaim ntawm peb niam txiv saum ntuj ceeb tsheej, thiab kawm seb peb puas yuav ceev cov lus txib. Nyob hauv phau Anplaham, tshooj peb 3 peb nyeem hais tias: “Thiab peb yuav sim lawv seb, lawv puas kam ua txhua yam uas tus Tswv lawv tus Vajtswv txib lawv ua.”<sup>1</sup>

Thaum peb los nyob hauv ntiaj teb no, peb coj ib qho txiaj ntsim zoo uas

los ntawm Vajtswv los—twb yog peb txoj kev ywj siab xaiv. Peb muaj ntau txoj koob hmoov vim peb muaj cai xaiv seb peb xav tau dab tsi. Nyob no peb kawm los ntawm tej yam uas peb ua yuam kev. Peb paub tau qhov zoo thiab qhov phem sib txawv li cas. Peb paub saj yam iab thiab yam qab. Peb kawm tias tej yam uas peb xaiv yuav hloov peb lub neej tom ntej.

Kuv paub tseeb hais tias peb tau ncaim peb Leej Txiv es tseem muaj lub siab xav rov qab los nrog Nws nyob dua, xwv kom peb yuav tau txoj kev tsa nto uas Nws tau npaj tseg rau peb thiab yog qhov uas peb xav tau thiab. Tab txawm peb raug tseg cia kom yuav tsum nrhiav thiab taug txoj hau kev uas yuav coj peb rov qab mus cuag peb Leej Txiv Saum Ntuj Ceeb Tsheej, Nws tsis tau xa peb los nyob peb ib leeg tsis muaj kev coj qhia thiab kev coj kav. Tab sis mas, Nws tau muab tej cuab yeej rau peb uas peb yuav xav tau, thiab Nws yuav

los pab thaum peb nrhiav Nws txoj kev pab thiab sim ua txhua yam tsav uas peb muaj cuab kav ua kom nyiaj mus txog thaum hnuv kawg thiab txais txoj sia nyob mus ib txhis.

Kom pab coj peb kev peb muaj Vajtswv thiab Nws tus Tub txoj lus uas nrhiav tau hauv peb cov vaj lug kub dawb ceev. Peb muaj Vajtswv cov yaj saub tej lus qhuab ntuas thiab lus qhia. Ib qho tseem ceeb heev, yog qhov uas peb muaj ib tug yam ntxwv zoo tag nrho uas peb yoog tau—uas yog peb tus Tswv thiab tus Cawm Seej, Yexus Khetos tus yam ntxwv—thiab peb twb txais lus qhuab qhia kom ua raws nraim li tus yam ntxwv ntawd. Tus Cawm Seej Kiag tau hais tias: “Los nrog kuv mus.”<sup>2</sup> “Rau tej hauj lwm uas nej tau pom kuv ua tej ntawd nej kuj yuav tsum ua thiab.”<sup>3</sup> Nws nug hais tias, “nej yuav tsum ua neeg zoo li cas?” Ces Nws teb hais tias, “Kuv hais tseeb rau nej tias, zoo tib yam li kuv.”<sup>4</sup> “Nws tau qhia txoj kev thiab tau coj peb kev.”<sup>5</sup>

Thaum peb tso Yexus ua peb tus Yam Ntxwv thiab peb raws Nws cov hneev taw qab, peb yuav muaj kev nyab xeeb thaum rov qab mus nrog peb Leej Txiv Saum Ntuj Ceeb Tsheej nyob ua ke tas mus li. Tus yaj saub Nifais hais tias, “Tsuas yog ib tug neeg yuav tsum ntseeg kom mus txog thaum kawg, ua raws li Vajtswv tus uas tseem muaj txoj sia nyob Leej Tub tus yam ntxwv xwb, nws yuav tsis raug cawm dim.”<sup>6</sup>

Ib tug poj niam, txhua zaus nws piav dab neeg txog thaum nws mus xyuas Thaj Av Dawb Huv, yuav qw hais tias, “Kuv tau taug tej kev uas Yexus twb taug lawm!”

Nws tau nyob ze qhov chaw uas Yexus nyob thiab qhuab qhia neeg. Tej zaum nws tau sawv ntawm ib lub pob zeb uas Nws tau sawv saum puag thaum ub los sis ntsia ib lub roob uas Nws twb ntsia dua thiab. Tej zaj ntawd, yeej zoo, es ua rau nws zoo siab heev; tiam sis txoj kev taug kev *hauv tej chaw* uas Yexus tau taug kev dua tsis tseem ceeb npaum li txoj kev taug kev *ib yam li* Nws taug kev. Txoj kev yoog Nws tus yam ntxwv thiab ua raws li Nws qhia yeej tseem ceeb dua txoj kev sim taug tej kev uas Nws tau taug thaum Nws tseem ua neej nyob.

Thaum Yexus caw kom ib tug neeg nplua nuj yuav, “Los, nrog kuv mus,”<sup>7</sup> Nws tsis yog caw kom tus neeg nplua nuj ntawd yuav raws Nws qab nce roob nqi hav hauv teb chaws xwb.

Peb tsis tas yuav taug tej kev tom ntug dej ze Kalilais los sis hauv tej roob ze Yeluxalees kom thiaj taug tau kev hauv qhov chaw uas Yexus tau taug. Peb sawv daws taug tau Nws txoj hau kev thaum, mloog Nws cov lus, muaj Nws tus ntsuj plig hauv peb siab, thiab Nws tej lus qhia coj peb kev, peb thiaj xaiv los raws Nws qab thaum peb taug kev hauv lub neej no. Nws tus yam ntxwv taw teeb rau peb pom kev. Nws hais tias, “Kuv yog txoj kev, qhov tseeb thiab yog txoj sia.”<sup>8</sup>

Thaum peb tshawb nrhiav txog tej kev uas Yexus tau taug, peb yuav pom hais tias Nws tau ntsib ntau yam teeb meem uas peb yeej yuav muaj hauv peb lub neej thiab.

Piv xam hais tias, Yexus taug kev muaj kev poob siab. Tab txawm Nws muaj ntau txoj kev poob siab los, ib qho kev poob siab loj heev uas Nws muaj yog thaum nws yws yws txog Yeluxalees thaum Nws tab tom yuav xaus Nws txoj kev qhuab qhia neeg. Haiv neeg Ixayees tau xyeej Nws pov tseg tab txawm nws tau ncav tes mus pab lawv. Thaum Nws ntsia lub nroog uas tab tom yuav raug puas tsuaj, Nws cia li muaj kev tu siab nrho. Thaum Nws nyuaj siab ntawd nws qw hais tias, “Yeluxalees, Yeluxalees! Koj muab cov uas cev Vajtswv lus tua pov tseg, koj muab pob zeb ntaus cov tub txib

uas Vajtswv txib los qhia koj! Muaj ntau zaum kuv twb yuav muab koj cov pej xeem los puag, ib yam li tus poj qaib cuab nws cov me nyuam los puag rau hauv nws ob phab tis, tiam sis koj tsis cia kuv ua li ntawd!”<sup>9</sup>

Yexus tau taug kev raug tej kev haub ntxias. Luxifaws, tus dab phem, tau sib sib zog, siv tag nrho nws tej tswv yim, es tau ntxias nws tom qab Nws tau yoo mov 40 hnuv thiab 40 hmo. Yexus tsis tau nyoos; tab sis mas, Nws tiv taus mus dhau txhua yam kev ntxias. Thaum ncaim mus Nws hais tias: “Dab Ntxwv Nyoog, koj cia li khiav ntawm kuv mus.”<sup>10</sup>

Yexus tau taug kev raug mob. Sim xav txog lub Vaj Khexemanes, nyob ntawd Nws tab tom “nyuaj siab kawg . . . nws tawm hws zoo li ntshav nrog rau hauv av.”<sup>11</sup> Thiab tsis muaj leej twg uas hnov qab tau qhov uas Nws raug txom nyem npaud thaum lawv muab Nws ntsia saum tus ntoo khaub lig.

Peb txhua leej txhia tus yuav taug txoj kev muaj kev poob siab, tej zaum yog vim peb xiam ib lub cib fim lawm, siv ib lub hwj chim yuam kev, ib tug neeg uas peb hlub xaiv yuam kev, los sis ib yam uas peb xaiv ua los tau. Peb txhua tus kuj yuav taug txoj kev raug kev haub ntxias thiab. Peb nyeem hauv tshooj 29 hauv phau Lus Qhuab Qhia thiab Kev Khi Lus hais tias tus dab phem yuav ntxias noob neej sawv daws, los sis lawv yuav tsis muaj kev ywj siab xaiv rau lawv tus kheej.<sup>12</sup>

Ib yam li ntawd peb yuav taug txoj kev raug mob thiab. Peb, cov uas yog cov tub qhev, yuav tsum paub tias peb yuav raug ib yam li tus Xib Hwb, uas tau tawm ntawm lub neej no tom qab raug mob thiab kev txom nyem ntau kawg lawm.

Peb yuav pom hais tias txoj kev uas peb taug yeej muaj kev tu siab kawg, peb tseem nrhiav tau kev zoo siab heev thiab.

Peb, nrog Yexus, taug tau txoj kev mloog lus. Txhua zaum yeej yuav tsis yooj yim, tiam sis cia peb hais lus ib yam li Xamuyees tshaj tawm hais tias: “Saib seb, kev mloog tus Tswv lus zoo dua qhov uas muab tej yaj zoo nkauj

tua fij rau nws.”<sup>13</sup> Cia peb nco qab hais tias thaum kawg txoj kev tsis mloog lus yuav ua rau peb mag thiab tuag mus xwb, tab sis mas thaum mloog lus ces peb thiaj yuav tau kev ywj pheej thiab txoj sia nyob mus ib txhis.

Peb, zoo li Yexus, taug tau txoj kev ua hauj lwm pab lwm tus neeg. Yexus lub neej thaum Nws mus qhuab qhia tib neeg yeej zoo li ib lub teeb uas ci tau kev ua siab zoo. Nws ua rau cov neeg ceg tawv txhais ceg muaj zog, ua rau cov neeg dig muag pom kev, cov lag ntseg txawj hnov lus.

Yexus taug txoj kev thov Vajtswv. Nws qhia peb tias peb yuav thov Vajtswv li cas thaum nws muab zaj lus thov zoo nkauj heev uas peb hu ua tus Tswv zaj lus thov Vajtswv. Thiab sawv daws yeej nco txog Nws zaj lus thov Vajtswv hauv lub Vaj Khexemanes hais tias: “Tsis ua raws li kuv lub siab nyiam, ua raws li koj lub siab nyiam xwb.”<sup>14</sup>

Tus Cawm Seej lwm cov lus qhia yeej nyob rau ntawm peb txhais tes, yus nrhiav tau nyob hauv cov vaj lug kub dawb huv. Hauv nws cov Lus Qhia Pem Roob, Nws hais kom peb zam txim, txo hwj chim, ua ncaj ncees, ua siab dawb siab zoo, ua kom muaj kev thaj yeeb nyab xeeb. Nws qhia kom peb ua siab loj tiv thaiv peb tej kev ntseeg, tab txawm luag tej tsim txom thiab luag thuam peb los xij. Nws thov kom peb cia peb lub teeb ci rau lwm tus neeg pom kev thiab kom lawv yuav xav muab yeeb koob rau peb Leej Txiv Saum Ntuj Ceeb Tsheej. Nws qhia peb kom ua neeg dawb huv tsis hais txog peb tej kev xav thiab tej yam peb ua los xij peem. Nws qhia peb tias txoj kev khaws nyiaj xtiag thiab qhov txhia chaw saum ntuj ceeb tsheej tseem ceeb tshaj txoj kev khaws tej ntawd hauv ntiaj teb no.<sup>15</sup>

Nws tej zaj lus piv txwv muaj hwj chim thiab hwj huam. Hauv zaj dab neeg txog tus neeg Xamalis zoo, Nws qhia peb kom sib hlub thiab ua hauj lwm pab peb cov neeg zej zog.<sup>16</sup> Hauv nws zaj paj lug txog cov nyiaj, Nws qhia peb kom kho peb tus kheej thiab sim ua neeg zoo tag nrho.<sup>17</sup> Zaj

paj lug txog tus yaj uas ploj lawm, Nws qhia peb kom mus cawm cov neeg uas tau tawm ntawm txoj kev thiab tau poob zoov lawm.<sup>18</sup>

Thaum peb sim tso Khetos hauv nruab plawv peb lub neej thaum peb kawm Nws tej lus, ua raws li Nws tej lus qhia, thiab taug Nws tej kev, Nws cog lus tias nws yuav muab txoj sia nyob mus ib txhis uas Nws raug kev tuag xwv kom peb thiaj tau. Tsis muaj ib yam uas siab tshaj qhov no, qhov uas peb yuav xaiv yuav Nws cov lus qhuab qhia thiab rais los ua Nws cov thwj tim thiab ua Nws tej hauj lwm hauv tag nrho peb lub neej. Tsis muaj lwm yam, lwm txoj kev xaiv rau peb, uas yuav pab peb rais los mus ua tus neeg uas Nws yuav pab peb ua.

Thaum kuv xav txog cov neeg uas twb sim ua raws li tus Cawm Seej tus yam ntxwv thiab tau taug Nws txoj hau kev, kuv txawm xav txog Gustav thiab Margarete Wacker—ob tug neeg uas ua zoo li Yexus tshaj lwm tus uas kuv xav tau txog. Nkawd yog neeg Yelemis thiab nkawd tau tsiv los nyob tim Canada teb tim sab hnuv tuaj, ces kuv tau ntsib nkawd thaum kuv ua qhov chaw tshaj tawm txoj moo zoo tus thawj tswj hwm nyob ntawd. Tij Laug Wacker khwv tau nyiaj thaum nws txiav neeg plaub hau. Txawm nkawd tsis tshua muaj nyiaj, nkawd

tau faib txhua yam uas lawv muaj. Nkawd tsis muaj hmoov muaj me nyuam li, tiam sis nkawd tau tu txhua tus neeg uas los rau hauv nkawd tsev. Cov txiv neej thiab poj niam uas tau kawm ntaub ntawv siab heev thiab yog neeg nplua nuj tau tuaj xyuas Vajtswv ob tug tub qhe uas txo hwj chim no thiab lawv xav tias lawv tau muaj hmoov vim lawv tau ntsib ob tug no rau ib ob xuab moos xwb.

Nkawd yeej zoo xws luag tej xwb, Nkawd tsis tshua txawj hais lus Akiv thiab nyuaj to taub, nkawd lub tsev tsis loj pes tsawg. Nkawd tsis muaj ib lub tshab los sis ib lub TV, thiab nkawd tsis tau ua tej yam loj loj uas tib neeg ntiav teb yuav qhuas nkawd txog. Tab sis mas cov neeg uas rau siab ntseeg tau taug kev mus rau lawv tsev kom lawv yuav hnov tau tus ntsuj plig hauv nkawd tsev. Nkawd lub tsev yog ib lub ntuj ceeb tsheej hauv ntiav teb no, thiab tus ntsuj plig uas nyob hauv yog kev thaj yeeb nyab xeeb thiab kev ua siab zoo xwb.

Peb kuj muaj tau tib tug ntsuj plig ntawd thiab faib tau rau lub ntiav teb thaum peb taug peb tus Cawm Seej txoj hau kev thiab ua raws li Nws tus yam ntxwv zoo tag nrho.

Peb nyeem hauv phau Paj Lug hais tias, “Ua tib zoo xav ua ntej uas koj yuav ua ib yam dab tsi.”<sup>19</sup> Thaum peb

ua li no, peb yuav muaj kev ntseeg, muaj lub siab xav, kom taug txoj hau kev uas Yexus tau taug. Peb yuav ntseeg hais tias peb nyob ntawm txoj hau kev uas peb Leej Txiv xav kom peb yuav taug. Tus Cawm Seej tus yam ntxwv ua ib tug txheej txheem rau peb saib, thiab Nws tej lus yeej coj peb txoj kev. Nws txoj hau kev yuav coj peb mus dawb mus huv txog tsev. Thov kom peb yuav tau txoj koob hmoov no, kuv thov los ntawm Yexus Khetos, tus uas kuv hlub, tus uas kuv ua hauj lwm rau, thiab tus uas kuv ua tim khawv txog lub npe, amees.

#### LUS CIM

1. Anplaham 3:25.
2. Lukas 18:22.
3. 3 Nifais 27:21.
4. 3 Nifais 27:27.
5. Eliza R. Snow, “How Great the Wisdom and the Love,” *Hymns*, naj npawb 195.
6. 2 Nifais 31:16.
7. Lukas 18:22.
8. Yauhas 14:6.
9. Lukas 13:34.
10. Mathais 4:10.
11. Lukas 22:44.
12. Lus Qhuab Qhia thiab Kev Khi Lus 29:39.
13. 1 Xamuyees 15:22.
14. Lukas 22:42.
15. Saib Mathais 5: 6.
16. Saib Lukas 10:30–37.
17. Saib Mathais 25:14–30.
18. Saib Lukas 15:4–7.
19. Paj Lug 4:26.

## Kev Qhia rau Peb lub Caij Nyoog

**T**xij thaum lub Kaum Hli Ntuj xyoo 2014 mus txog lub Plaub Hlis Ntuj xyoo 2015, yuav tsum npaj ib zaj los yog ob peb zaj lus hais los ntawm lub Kaum Hli Ntuj xyoo 2014 lub tuam rooj sab laj kom qhia hauv pawg Pov Thawj Hwj Mekixedes thiab Koom Haum Niam Tsev tej kev sib ntsib thaum hnuv Sunday. Thaum Plaub Hlis Ntuj xyoo 2015, xaiv tau tej zaj los ntawm lub Kaum Hli Ntuj xyoo 2014 los sis Plaub Hlis Ntuj xyoo 2015 lub tuam rooj sab laj. Ceg txheem ntseeg thiab koog chaw cov thawj tswj hwm yuav tau xaiv tej zaj lus hais uas yuav siv nyob hauv lawv tej cheeb tsam, los yog lawv muab lub luag hauj lwm no so rau cov npisov los yog ceg ntseeg cov thawj tswj hwm xaiv los tau thiab.

Cov lus hais no muaj txawm peem ua ntau yam lus nyob rau ntawm [conference.lds.org](http://conference.lds.org).



**Los ntawm Thawj Tswj Hwm Dieter F. Uchtdorf**

Tus Pab Cuam thib Ob hauv Thawj Pawg Thawj Tswj Hwm

# Txais Lus Tim Khaww txog Qhov Kaj thiab Qhov Tseeb

*Nej zaj lus tim khaww txog qhov kaj thiab qhov tseeb yuav foom koob hmoov rau nej thiab nej cov poj koob yawm txwv nyob hauv lub neej no, thiab nej yuav muaj nej zaj lus tim khaww mus ib txhis.*

**T**haum kuv yog ib tug kws tsav nyab hoom, kuv tau siv sij hawm ntau hla tej teb chaws thiab tej dej hiav txwv thaum tsaus ntuj. Thaum kuv saib lub ntuj ceeb tsheej ntawm qhov chaw tsav nyab hoom lub qhov rais, qhov tseem ceeb yog Kab Lig Ntuj, uas ua rau kuv xav tsis thooob txog txhua yam uas Vajtswv tau tsim—tej uas cov vaj lug kub qhia hais tias yog tej ntiaj teb suav tsis txheeb.<sup>1</sup>

Ze li ib puas xyoo tas los cov kws saib hnuv qub feem coob xav tias Kab Lig Ntuj yog tib pawg hnuv qub nyob saum ntuj ceeb tsheej.<sup>2</sup> Lawv xav tias txhua yam nyob dhau Kab Lig Ntuj yog ib tshav loj uas tsis muaj dab tsi, ib qho chaw khoob lug—txias thiab tsis muaj hnuv qub, tsis muaj qhov kaj thiab tsis muaj txoj sia.

Lawv kho tej twj saib hnuv qub kom muaj zog zuj zus tuaj—tsis hais cov twj saib hnuv qub uas lawv xa mus nyob saum ntuj—ces cov kws saib hnuv qub pib to taub qhov tseeb uas ua rau lawv xav tsis thooob: lub ntuj khwb no yeej loj tshaj li leej twg xav, thiab muaj tej kab lig ntuj suav tsis txheeb uas nyob deb kawg, txhua pawg hnuv qub muaj hnuv qub ntau kawg nkaus.<sup>3</sup>

Tsis tau siv sij hawm ntev, es peb txoj kev to taub txog lub ntuj khwb no twb hloov kiag.

Niaj hnuv no peb pom tau tej pawg hnuv qub uas nyob deb heev.<sup>4</sup>

Peb paub tias tej hnuv qub nyob ntawd.

Cov hnuv qub ntawd twb nyob tau ntev lawm.

Tiam sis ua ntej tib neeg muaj tej twj uas txawj pom deb pom qhov

kaj nyob saum ntuj thiaj pom tau tej pawg hnuv qub, peb tsis tau ntseeg tias yuav muaj li ntawd.

Qhov uas lub ntuj khwb loj heev tsis tau hloov kiag, tiam sis peb txoj kev txawj saib thiab to taub qhov tseeb no twb hloov ntau heev. Thiab vim muaj qhov tseeb ntawd, tib neeg thiaj paub txog tej yam uas peb ib txwm tsis tau xav txog.

## **Nyuaj rau Peb Ntseeg tej uas Peb Tsis Pom**

Cia li xav seb yog nej txawj rov qab mus rau yav tas los thiab sib tham nrog cov neeg uas nyob ib txhiab los yog ib puas xyoo dhau los. Cia li xav seb yuav zoo li cas yog nej piav rau lawv txog tej lub tshuab uas muaj niaj hnuv no uas peb xav tias txhua tus muaj. Piv txwv hais tias, cov neeg no yuav xav dab tsi yog peb qhia lawv txog cov nyab hoom loj loj, cov qhov cub microwave, tej lub tshuab ntawm tes uas muaj ntaub ntawv ntau kawg nyob haud, thiab cov video txog peb cov xeeb ntxwv ua peb faib tau rau cov neeg coob nyob thooob plaws lub ntiaj teb?

Ib txhia yuav ntseeg peb. Feem ntau yuav thum peb, cem peb, los yog xav ua rau peb mob. Ib txhia yuav siv tej tswv yim, kev txawj ntse, thiab qhov tseeb uas lawv paub kom qhia hais tias peb tsis paub tseeb, peb ruam, los yog peb txaus ntshai. Tej zaum lawv yuav rau txim rau peb vim peb sim coj lwm tus ua yuam kev.

Tiam sis, cov neeg no yog cov uas ua yuam kev. Tej zaum lawv muaj siab zoo thiab xav ua ncaj ncees. Tej zaum lawv xav tias lawv paub tseeb tiag tiag. Tiam sis lawv yeej pom tsis meej vim lawv tseem tsis tau txais qhov kaj tag nrho ntawm qhov tseeb.

## **Kev Cog Lus tias Yuav Muaj Qhov Kaj**

Zoo li tib neeg peb txhua tus xav tias peb paub qhov yog txawm peb tsis paub. Yog li ntawd, puas muaj kev cia siab tias peb yuav paub qhov tseeb? Puas yog peb yuav tsis paub qhov tseeb hauv peb lub neej vim muaj tswv yim sib txawv ntau heev thiab peb cia siab rau peb txoj kev to taub thiab kev ntseeg xwb?

Peb puas nrhiav tau qhov tseeb?

Lub hom phiaj ntawm kuv tej lus yog tshaj tawm txoj moo zoo siab uas Vajtswv—Ib Tsoom Tub Rog tus Tswv uas paub txhua yam kev tseeb—tau cog lus rau Nws cov me nyuam hais tias lawv muaj peev xwm paub qhov tseeb ntawm lawv tus kheej.

Cia li xav txog los lus cog tseg tseem ceeb npaum li cas:

Vajtswv tus uas Nyob Kav Ib Txhis thiab Siab Tshaj Plaws, tus uas Tsim tag nrho lub ntuj khwb no, yuav hais lus rau cov uas thov Nws nrog ib lub siab dawb paug thiab thov tiag tiag.

Nws yuav hais lus rau lawv nyob hauv tej zaj npau suav, tej kev ua yog toog, thiab tej kev xav.

Nws yuav siv ib txoj kev hais lus rau lawv uas tsis yog los ntawm neeg los kom lawv paub tseeb. Nws yuav coj lawv kev thiab teb kom pab lawv lub neej.

Yeej yuav muaj ib txhia uas saib tsis taus thiab hais tias yeej muaj tsis tau li ntawd, lawv hais tias yog muaj ib tug Vajtswv, nws yuav muaj tej yam tseem ceeb dua li mloog thiab teb ib tug neeg txoj kev thov Nws.

Tiam sis kuv qhia qhov no rau nej: Vajtswv yeej hlub nej. Nws yuav mloog, thiab Nws yuav teb nej tej lus nug. Raws li txoj kev thiab lub sij hawm uas Nws pom zoo Nws yuav teb nej tej lus thov, thiab yog li ntawd, nej yuav tsum kawm mloog Nws lub suab. Vajtswv xav kom nej rov qab mus cuag Nws, thiab tus Cawm Seej yog txoj kev ntawd.<sup>5</sup> Vajtswv xav kom nej kawm txog Nws Leej Tub, Yexus Khetos, thiab nyob kaj siab lug thiab muaj kev xyiv fab uas los ntawm txoj kev ua thwj tim.

Kuv cov phooj ywg zoo, muaj ib qho yooj yim uas nej ua tau kom sim seb tej no puas muaj tseeb, nrog kev cog lus ntawm Vajtswv, uas muaj nyob hauv phau vaj lug kub rau txhua tus txiv neej, poj niam thiab me nyuam uas muaj siab xav ua:

*Qhov thib ib*, nej yuav tsum tshawb nrhiav Vajtswv txoj lus. Qhov no txhais hais tias nej nyeem cov vaj lug kub thiab kawm txog cov yaj saub tej lus txog Yexus Khetos txoj moo zoo tsis hais cov yaj saub thaum ub thiab cov yaj saub niaj hnuv nim no—tsis yog vim nej xav ua xyem xyav los yog cem tiam sis yog vim nej xav paub qhov tseeb tiag. Xav txog tej yam uas nej yuav hnov hauv nej lub siab, thiab npaj nej lub siab kom txais tau qhov tseeb.<sup>6</sup> “Yog tsis muaj dab tsi ntau tshaj li uas nej xav los ntseeg, cia lub siab xav ntseeg no ua hauj lwm nyob hauv nej, mus txog thaum nej . . . muab tau ib qho chaw rau [Vajtswv txoj lus] nyob.”<sup>7</sup>

*Qhov thib ob*, nej yuav tsum xav txog thiab rau siab xav ntseeg,<sup>8</sup> thiab ua Vajtswv tsaug rau tus Tswv txoj kev hlub tshua rau Nws cov me nyuam txij thaum Adas nyob los txog peb lub caij nyoog thaum nws muab cov yaj saub, cov pom tau, thiab cov qhia kev tshwm sim kom coj Nws lub Koom Txoos thiab pab peb nrhiav kev rov qab mus cuag Nws.

*Qhov thib peb*, nej yuav tsum nug nej Leej Txiv Saum Ntuj Ceeb Tsheej, los ntawm Nws Leej Tub, Yexus Khetos, lub npe kom Nws qhia rau nej tias Yexus Khetos lub Koom Txoos ntawm Tsoom Haiv Neeg Ntseeg hauv Hnuv Nyoog Kawg muaj tseeb. Thov nrog ib lub siab dawb paug, xav paub tiag tiag, thiab muaj kev ntseeg Khetos.<sup>9</sup>

Kuj muaj *qhov thib plaub*, uas tus Cawm Seej qhia peb hais tias: “Yog leej twg txaus siab ua raws li Vajtswv lub siab nyiam, tus ntawd yuav paub hais tias tej lus uas kuv qhia no yog Vajtswv kom kuv hais los sis yog kuv hais kuv xwb.”<sup>10</sup> Ua lwm yam lus hais, thaum nej sim seb txoj moo zoo tej ntsiab cai puas muaj tseeb,

nej yuav tsum ua raws li tej ntsiab cai ntawd. Ua raws li tej lus qhuab qhia ntawm txoj moo zoo thiab tej lus qhia ntawm lub Koom Txoos sim seb puas muaj tseeb. Muaj siab dawb paug ua thiab muab siab rau ntseeg Vajtswv.

Yog nej ua li no, Vajtswv cog lus rau nej—Nws tej lus yeej yog kev khi lus<sup>11</sup>—hais tias Nws yuav qhia qhov tseeb rau nej los ntawm tus Vaj Ntsuj Plig Dawb Huv lub hwj chim. Nws yuav muab qhov kaj ntxiv kom nej pom tau hauv qhov tsaus ntuj thiab ua tim khawv txog tej yam uas tib neeg hauv lub ntiaj teb yeej tsis txawj to taub.

Ib txhia hais tias nyuaj ua tej yam no los yog tsis tas siv zog ua li ntawd. Tiam sis kuv hais tias ib zaj lus tim khawv txog txoj moo zoo thiab lub Koom Txoos yog qhov tseem ceeb tshaj plaws uas koj txais tau hauv lub neej no. Ib zaj lus tim khawv yuav foom koob hmoov thiab coj nej hauv lub neej no, thiab yuav pab nej lub neej nyob mus ib txhis.

## **Yuav Tsum Muaj tus Ntsuj Plig Kom To Taub tej Yam Los ntawm tus Ntsuj Plig**

Cov kws tshawb fawb twb tsis to taub kab lig ntuj loj npaum li cas mus txog thaum lawv tej cuab yeej muaj zog txaus kom pom qhov kaj loj zog lawv thiaj yuav to taub qhov tseeb ntau dua li qhov qub.

Tus Thwj Tim Povlaj qhia ib lub ntsiab cai li no txog tej kev txawj ntse ntawm sab ntsuj plig. Nws sau rau cov Neeg Khauleethaus hais tias, “Tus neeg ntiaj teb yeej tsis tau txais tej uas Vajtswv tus Ntsuj Plig pub, rau qhov lawv pom hais tias tej ntawd tsis muaj qab hau dab tsi, thiab lawv tsis to taub txog tej ntawd, rau qhov lawv tsis muaj Vaj Ntsuj Plig lawv thiaj tsis totaub tej ntawd.”<sup>12</sup>

Ua lwm yam lus hais, yog nej xav paub qhov tseeb ntawm sab ntsuj plig, nej yuav tsum siv tej cuab yeej yog lawm. Nej yuav tsis to taub qhov tseeb ntawm sab ntsuj yog nej tsis siv tej cuab yeej uas ntsuas tau sab ntsuj plig.

Tus Cawm Seej tau qhia rau peb hauv peb lub caij nyoog hais tias yam

uas los ntawm Vajtswv los, yog qhov kaj; thiab tus uas txais qhov kaj, thiab ua raws li Vajtswv hais ntxiv mus, txais qhov kaj ntxiv; thiab qhov kaj ntawd yuav ci kaj zus kaj zus mus txog hnuv zoo tag nrho.<sup>13</sup>

Peb yim tso siab rau Vajtswv, qhov kaj yim loj tuaj hauv peb sab ntsuj plig. Thiab txhua zaus peb rau siab nrhiav qhov kaj ntawd, peb qhia rau Vajtswv hais tias peb twb npaj txais qhov kaj ntxiv. Ua rau tej yam tsis mee, tsaus ntuj nti, thiab nyob deb thaum yav tas los hloov los ua tej yam mee, kaj zuj zus, thiab nyob ze.

Tiam sis zoo ib yam li ntawd, yog tias peb tawm ntawm qhov kaj ntawm txoj moo zoo, peb qhov kaj yuav pib ploj zuj zus—tsis yog ploj ploj thaum ib hnuv xwb tiam sis ploj zuj zus mus—mus txog thaum peb xav txog peb lub neej thiab tsis to taub vim li cas peb twb ntseeg hais tias txoj moo zoo muaj tseeb. Tej zaum ua rau peb xav tias tej yam uas peb paub dhau los yog kev ruam xwb vim qhov uas mee thaum yav tas los twb plooj thiab nyob deb zuj zus.

Povlauj thiaj qhia hais tias zaj xov ntawm txoj moo zoo twb tsis tseem ceeb rau cov uas piam sij, “tiam sis [rau cov uas]txais kev cawm seej [txoj moo zoo] yog Vajtswv lub hwj chim.<sup>14</sup>

### **Lub Koom Txoos Tsis Ntsuas Neeg lub Siab**

Yexus Khetos lub Koom Txoos ntawm Tsoom Haiv Neeg Ntseeg hauv Hnuv Nyoog Kawg yog ib qho chaw rau cov neeg uas muaj tej zaj lus tim khawv tsis hais muaj zog npaum li cas los yog. Muaj tej tug mej zeej ntawm lub Koom Txoos uas lawv zaj lus tim khawv ruaj khov thiab ci ntsa iab nyob hauv lawv. Lwm tus tseem nrhiav xav paub ntawm lawv tus kheej. Lub Koom Txoos yog ib lub tsev rau txhua tus koom ua ke, txawm lawv zaj lus tim khawv muaj zog npaum li cas. Kuv tsis paub txog ib daim uas peb muab

dai ntawm peb tej tsev sib ntsib uas hais tias, “Nej zaj lus tim khawv yuav tsum siab npaum li no kom thiaj muaj cai nkag hauv.”

Lub Koom Txoos tsis yog ib qho chaw rau neeg zoo tag nrho tiam sis yog ib qho chaw pab neeg “los cuag Khetos, thiab ua kom zoo tshaj plaws [dhau los ntawm] nws.”<sup>15</sup> Lub Koom Txoos no yog ib qho chaw rau neeg zoo li nej thiab kuv. Lub Koom Txoos yog ib qho chaw uas tos txais thiab pab neeg, tsis yog ib qho chaw uas ntiab neeg tawm los yog cem lawv. Yog ib qho chaw uas peb ib leeg ncau tes pab thiab txhawb nqa ib leeg thaum peb nrhiav qhov tseeb.

Thaum kawg, peb txhua tus nrhiav Vajtswv txoj kev kaj thaum peb taug kev ua Nws cov thwj tim. Peb tsis rau txim rau lwm tus vim lawv tsis muaj qhov kaj ntau; tiam sis peb tu qhov kaj kom mus txog thaum qhov kaj ci ntsa iab, mee thiab tseeb.

### **Kev Cog Lus rau Txhua Tus**

Xav kom peb paub tias kev txais ib zaj lus tim khawv tsis yog ib qho uas peb yuav siv ib feeb, ib teev, los yog ib hnuv xwb. Tsis yog yus ua ib zaug xwb es yus thiaj tau. Qhov uas peb nrhiav qhov kaj ntawm sab ntsuj plig yog ib qho uas siv tag nrho peb lub neej ua.

Nej zaj lus tim khawv txog Vajtswv Leej Tub thiab Nws lub Koom Txoos uas tau muab txum tim rov qab los, Yexus Khetos lub Koom Txoos ntawm Tsoom Haiv Neeg Ntseeg hauv Hnuv Nyoog Kawg, tej zaum yuav tsis los rau nej sai sai, tiam sis kuv cog lus rau nej tias, yog nej ua tej yam nej yuav tsum ua, ces nej yuav tau txais.

Thiab yuav muaj koob mee heev.

Kuv ua tim khawv rau nej tias qhov tseeb ntawm sab ntsuj plig yuav puv nej lub siab thiab coj qhov kaj rau nej sab ntsuj plig. Yuav ua rau nej txais kev txawj ntse tseeb

thiab kev xyiv fab thiab kev kaj siab lug. Kuv tau txais tej yam no los ntawm tus Vaj Ntsuj Plig Dawb Huv lub hwj chim.

Ib yam li cov vaj lug kub thaum ub cog lus, Vajtswv tus Ntsuj Plig yuav ua rau nej xav hu zaj nkauj ntawm kev hluv uas txhiv dim,<sup>16</sup> tsa muag saib ntuj ceeb tsheej, thiab tsa suab qhuas Vajtswv tus uas Siab Tshaj Plaws, tus uas Tiv Thaiv nej, tus uas nej Cia Siab rau, tus uas Pov Hwm nej, nej Leej Txiv. Tus Cawm Seej cog lus tias yog nej nrhiav, ces nej yuav nrhiav tau.<sup>17</sup>

Kuv ua tim khawv hais tias qhov no muaj tseeb. Yog nej nrhiav Vajtswv txoj kev tseeb, ces qhov uas tam sim no nej pom tsis mee, qhov uas nyob deb mas nej yuav pom mee zuj zus tuaj, thiab yuav los nyob ze hauv nej lub siab dhau los ntawm Vajtswv txoj kev tshav ntuj. Vajtswv yuav muab tej yam zoo kawg nkaus ntawm sab ntsuj plig, uas nej ib txwm tsis tau pom tshwm sim rau nej.

Kuv ua tim khawv hais tias qhov kaj ntawm sab ntsuj plig yog ib qho uas Vajtswv txhua tus me nyuam txais tau. Qhov kaj no yuav ua rau nej to taub zoo, kho nej lub siab thiab ua rau nej muaj kev xyiv fab. Kuv cov phooj ywg, tsis txhob sej tsis txhob tos kom ntxiv zog rau nej zaj lus tim khawv txog Vajtswv txoj hauj lwm, uas yog txoj hauj lwm ntawm qhov kaj thiab qhov tseeb.

Nej zaj lus tim khawv txog qhov kaj thiab qhov tseeb yuav foom koob hmoov rau nej thiab nej cov poj koob yawm txwv nyob hauv lub neej no, thiab nej yuav muaj nej zaj lus tim khawv mus ib txhis, nyob hauv tej lub ntiaj teb uas suav tsis txheeb. Kuv ua tim khawv txog qhov no thiab thov Vajtswv foom koob hmoov rau nej los ntawm Yexus Khetos lub npe amees.

## LUS CIM

1. Mauxes 1:33.
2. Saib Marcia Bartusiak, *The Day We Found the Universe* (2009), xii. Ua rau kuv xav tsis thoob uas peb paub tseeb tias qhov uas peb xav yog qhov yog. Tej lub sij hawm peb ntseeg hais tias peb twb kawm txhua yam tseeb lawm. Piv txwv hais tias: "Simon Newcomb, tus thawj ntawm kev saib hnuv qub hauv teb chaws Amelikas hauv xyoo 1900 tawm, hais nyob ntawm kev muab qhov chaw saib hnuv qub fij tseg hais tias 'hais txog kev saib hnuv qub . . . zoo li peb twb yuav luag txog lub sij hawm uas peb paub tag nrho. . . . Yog li ntawd tej hauj lwj uas cov kws saib hnuv qub ua tam sim no feem ntau tsis yog kev nrhiav tej yam
3. Ntxim xav txog Mauxes 1:33, 35 tom qab peb nrhiav tau qhov no "tsis ntev tas los." Tus Tswv tau muab phau Mauxes nyob hauv phau Hlaws uas Muaj Nqi tshwm sim rau tus Yaj Saub Yauxej Xamiv thaum lub Rau Hli Ntuj xyoo 1830, yuav luag ib puas xyoo ua ntej Edwin Hubble tshaj tawm tias nws twb nrhiav tau tej kab lig ntuj nyob deb heev.
4. Saib, piv txwv, Hubble Heritage Image Gallery nyob ntawm [heritage.stsci.edu/gallery/gallery.html](http://heritage.stsci.edu/gallery/gallery.html).
5. Saib Yauhas 14:6.
6. Saib 3 Nifais 17:3.
7. Amas 32:27.
8. Saib Lus Qhuab Qhia thiab Kev Khi Lus 67:3.
9. Saib Maulaunais 10:3–5.
10. Yauhas 7:17; kuj saib Phau Ntawv Nkauj 25:14; Yauhas 3:21.
11. Saib Lus Qhuab Qhia thiab Kev Khi Lus 82:10.
12. 1 Kauleethaus 2:14.
13. Lus Qhuab Qhia thiab Kev Khi Lus 50:24.
14. 1 Kauleethaus 1:18.
15. Maulaunais 10:32; kuj saib Lus Qhuab Qhia thiab Kev Khi Lus 20:59.
16. Saib Amas 5:26.
17. Saib Lus Qhuab Qhia thiab Kev Khi Lus 88:63.

© 2014 los ntawm Intellectual Reserve, Inc. Ceev txhua txoj cai. Luam tawm hauv Teb Chaws Amelikas. Pub txhais ua lus Akiv: 6/14. Pub txhais ua lus Hmoob: 6/14. Kev txhais *Visiting Teaching Message, November 2014*. Hmong. 10871 295